

Regional News Unit AIR Aizawl
Thursday, April 17, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Home Minister Pu K Sapdangan Mizoram leh Assam ramri chungchangah ramri him tak, mipuite thlamuang taka an khawsak theihna tur nawr chhuah chu an thupui ber a ni ang a ti.
- Mizo Zirlai Pawl chuan Phuldungsei Thaidawr Tlanga Tripura sorkar hmalakna chu a rang lama ti tawp tura hriattir turin Mizoram sorkar a ngen.
- Ramchhunga rel kawng leiverh tunnel thui ber km 14.57 thui Uttarakhand-a Rishikesh-Kamprayag inkar ami chu nimin khan zawh fel a ni.
- Supreme Court chuan Waqf (Amendment) Act 2025 khinna thubuai vawiinah a ngaihtuah chhunzawm dawn.

<><><>

MIZORAM STATE BOUNDARY COMT

Tun thla ni 25 a Guwahati, Assam-a Mizoram leh Assam State Secretary-level meeting neih tur chungchang thlirhovin nimin khan Mizoram State Boundary Committee chu an Chairman, Home Minister Pu K. Sapdanga hovin an thukhawm a,

Thutkhawmah hian Home Minister chuan ramri him tak, mipuite thlamuang taka an khawsak theihna tur nawr chhuah chu an thupui ber a nih thu a sawi a. Mizoram tana channa awm lo tura theihtawp chhuah a nih thu sawiin Mizoram leh Assam ramri zirchiang tur Study Group member 4 awmna pawh kumin January ni 25 khan din a nih thu sawiin, he Study Group hian chhuanawm takin hma an lak thu leh, anni zarah document tan chhan tur pawh an nei tha tawh hlea an inhriat thu a sawi a. Mizoram aiawha ramri chungchang inbiakna a palai kalturte pawh an inpuahchahna a tha thawkhata a hriat thu sawiin, Mizoram tan theihtawp chhuah turin a fuih a ni.

Mizoram sawrkar atanga thu ken turte leh pawimawh dang chi hrang hrang he thutkhawmah hian sawiho a ni a. Mizoram – Assam State Secretary-level meeting-ah hian Mizoram sawrkar chuan Home Secretary Pu Vanlalmawia hovin palai mi 7 a tir dawn a ni.

Boundary Committee thutkhawm hmasa ber hi kum 2021 July ni 30 khan neih a ni a. Thutkhawm vawi 2-na hi kum 2021 September ni 7 khan neih niin a vawi 3-na chu kum 2021 November ni 17 khan neih a ni a. A vawi 4-na chu kum 2022 September ni 9 ah neih niin, a vawi 5-na hi kum 2023 January ni 20 khan neih a ni a, a vawi 6-na chu nikum January 25 khan neih a ni leh a. Tun tum hi Mizoram sawrkar thar a pian hnua thutkhawm vawi 2-na a ni.

<><><>

ART & CULTURE MINISTER

Art & Culture Minister Pu C. Lalsawivungan Mizo thalaite zingah tawnghmang dikhlel deuh leh hawrawp mumal lo ta taka zia a hluara ngaih theih a nih thu leh inzirtir uar a tul thu a sawi.

Nimina ATI Auditorium, MINECO-a SCERT leh Mizo Language Development Board (MLDB) tangkawpin an buatsaih pawl 5 atanga pawl 8 zirlaite tana "thawnthu tawi inziahsia" lawmman semna hun a hmanpuinaah he thu hi sawiin Minister chuan tawng chu hnam tin nunphunga bet tlat, hnam ro hlu berte zing a mi a nih thu a sawi a. Thangthar ten Mizo tawng pawimawhzia an hriat chian leh zual theihna tur leh, tawnghmang dik zawkte an zir chhoh theihna tura SCERT leh MLDB-te hmalakna chu ropui a tih thu a sawi a, zirlaite chu Mizo tawng hlutzia leh hman dik a pawimawhzia te hre thar zel turin a chah a ni.

Minister hian Mizo Language Development Board Website leh Logo a tlangzarh baw a ni.



MYC

Mizoram Youth Commission (MYC) Chairman Pu Malsawmzuala Ralte chuan kum khat chhunga MYC hmalaknaa Mizo thalai hna hmu mi 153 an awm thu a sawi.

Nimina MYC pisaa an hmalakna hrang hrang hrilha chanchinbumite a kawmnaah he thu hi sawiin MYC Chairman chuan heng thalai hna hmu thar zinga sorkar hna hmu thar chu 33 an nih thu a sawi a. MYC, Honda CSR leh Visan Foundation te nena tanhona hnuaiah hospitality sector-a training course thawhkhatna zo tawh mi 122 zinga mi 97 in hotel hrang hrang hna an hmuh thu a sawiin British Army dilna mi 247 an thehluh sak tawh a, heng mite zinga visa hmu fel tawh mi 5 chu UK-a assessment ti tura an thlen tawh thu a sawi a. Visa result nghak mek mi 4 awm bawkin British sipaia tan tum te hi Mizo tlangval British Army-a thawk mek ten an lo buaipui thin thu a sawi a ni.

MYC Chairman chuan MYC leh The Lalit Group, New Delhi thawhdunna hnuaiah Spa therapy training dil mi 100 atangin mi 7 thlanchhuah an nih thu leh training an neih mek thu a sawi a. Sri City Employment programme hnuaiah Mizo thalai mi 8 hnathawk tura thlahliam an nih thu leh Cabin Crew/Air Hostess interview hmachhawn tur Mizo nula 104 te tuaihriamna hun, grooming session hmanpui an nih tawh thu a sawi.

MYC Chairman chuan sorkar atanga an budget neih chu hmalak tak tak nan a beitham thu sawiin hetihruah hian kawng hrang hrang an hmalakna tura sum hmuh theih dan tur an dap zel thu a sawi a. Assembly thutkhawmin a pass, MYC Bill, 2025 chu Commission ruahmanna fel zawk leh mumal zawk siamna tur a nih thu a sawi baw a ni.



WEATHER

Mizoramah fur ruahtui hmasa a tla tan a, khawchin thlirlawkna Aizawl Meteorological Centre chuan vawiin hian Mamit, Kolasib leh Saitual district ah te ruah a sur thei a ni.

Aizawl Meteorological Centre Pu Sudheer Kumar Dwivedi-a chuan Aizawl Dist ah pawh ruah leh thli na vaklo, darkar khata km 30/40 vela chak a tleh tel thei a ni.

<><><>

MIZORAM NGO REPS IN DELHI

Mizoram flawmngai pawl hrang hrang aiawh ten New Delhi ah Union Home Secretary Pu Govin Mohan hmu in Myanmar nena zalen taka ramri-a inkalpawhna tihtawp chungchang leh ramri hung chungchang an sawipui.

Union Home Secretary chuan, Mizoram leh Myanmar inkar hung tura hmalaknaah Mizoram flawmngai pawl te thlawpna an beisei tih sawiin dodal lo hram turin a lo ngen a. Thutkhawma tel NGO hruaitute chuan, Free Movement Regime leh Ramri hung chungchângah flawmngai pawl intelkhawm NGO Co-Ordination Committee anga ngaihdan awmsa an sawi a, Home Secretary hnenah a tul anga ram mipuite ngaihdan leh duhdan ngaipawimawh thiam turin an ngen a ni.

NGO hruaitute chuan Union Home Minister Aizawl a alo zin laia a sawi, Lengpui Airport, Airport Authority of India (AAI) kuta hlan chungchang hmalak tawh dan an zawt a. Mizoram a ruihhlo hluar lutuk chungchang leh Mizorama rampawn lam mi luh phalna Protected Area Regime chungchang leh pawl hrang hrang hmachhawpte an sawi nawn bawk a ni.

Union Home Secretary chuan, Lengpui Airport chu Mizo mipuite duh dan anga AAI kuta hlan tura an lo sawi tawh angin, hma an lak mek thu a sawi a. Mizoram Chief Secretary chu proposal siam a, a rang lama thehlut tura an hriattîr tawh thu a sawi a, an intiam tawh anga thla thum chhung ngeia hma an lak hman tur thu a sawi. Ruihhlo chungchângah Union Home Secretary chuan, Mizoram a ruihhlo hluar lutuk a vei thu leh, Mizo mipui ten nasa taka an do chu lawmawm a tih chu sawiin, sum leh pai leh hmanrua a tul apiang hemi kawnga hmalatute an puih tur thu a sawi a. Narcotics Control Bureau (NCB) kaltlanga an puih tur thu a sawi a ni.

Home Secretary chuan Mizoram luh phalna Protected Area Regime awlsam zawka lak a nih theih nan ruahmanna a lo siam nghal tur thu leh a enzui turin Intelligence Bureau Joint Secretary (NE) a ruat nghal a. Heng bakah hian, Mizoram tana hmasawinna tur hrang hrang Home Secretary hi an sawipui bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

MZP

Mizo Zirlai Pawl chuan Phuldungsei Thaidawr Tlanga Tripura sorkar hmalakna chu a rang lama ti tawp tura hriattir turin a Mizoram sorkar a ngen. MZP hruaitute chuan Thaidawr tlang, Phuldungsei Mizoram chhunga Tripura sawrkar-in kut an thlakna hmun hi nimin khan an tlawh a, helai hmun a hmalakna zawng zawng hi ti tawp nghal turin a hmun a hnathawktute an hriattir a. Mizoram sawrkarin Thaidawrtlang panna kawng link road laih tlang pawh sawrkar hian ngaihven zui nghal vat turin MZP chuan a ngen a ni. He hunah hian, Phuldungsei Village Council hruaitute leh Mizo Convention: Youth Wing, Jampui Hills te'n MZP hruaitute hi an tawiawm a ni. MZP President Pu H. Lalthianghlina chuan Tripura sawrkarin kut a rawn thlakna Phuldungsei Jampui Hills khuaa Thaidawr tlang chu 1933 Regulation ah Mizoram ramchhung a nihna chiang takin a lang a ti a, chak taka hma la turin Mizoram sawrkar an phut tih a sawi a, Thaidawr tlang ah tun hma in Mizoram sawrkarin kawng alo lai tawh thin a ti a, tun hnaiah hmalakna a awm tak loh avangin Tripura sawrkar an rawn che ta nia ngaih theih anih thu leh ration card paihsak an awm vang te a ni thei tih sawiin Mizoram lam chet lak ve vat a ngaih thu a sawi.

Byte of MZP President

Tun hnaia Assembly thutkhawmah Hachhek bialtu MLA Pu Robert Romawia Royte chuan Phuldungsei khuaa mi 85 te Ration Card paih sak an nih chungchang hi a sawi chhuak a, Supply Minister Pu B. Lalchhanzova chuan mi 85 te chu Tripura lama Aadhar ah ziahluh an lo nih tawh vang leh dan angin ram pumah mi pakhatin ration card pakhat aia tam a nei thei loh avangin Mizoram lama an hming chu khawl hmanga paih a ni tih a sawi a, chhungkaw 21 a member 85 te chu Mizoram sorkar chuan khua leh tui humhim nan Manual Ration Card siam sakin, AAY quota angin thla tin buhfai KG 35 pek thin an ni tih a sawi a ni. Environment, Forest & Climate Change Minister Pu Lalthansanga chuan thawhlejni khan Thaidawr tlang hi tlawhin Hma an lakna hmun nia an sawi chu tun hma atanga Mizo lal te luah ram leh thuthmun a nih thu sawiin a hmun enkawl leh tuaihnum kawngah an lo muthlu rei hle a ni tih Mizo Convention hruaitute nen an inkawmna atangin a lang tih a sawi bawk.

<><><>

RAIL

Ramchhunga rel kawng leiverh tunnel thui ber km 14.57 thui Uttarakhand-a Rishikesh-Kamprayag inkar ami chu nimin khan zawh fel a ni. Pauri Garhwal-a Janasu ah he project hi tluang taka zawh fel a ni a.

He hunah hian Union Railway Minister Aswini Vaishnaw leh Uttarakhand Chief Minister Pushkar Singh Dhami te pawh an tel a. Union Railway Minister Ashwini Vaishnaw chuan tuna leiverh zawh tak hian a chhehvel inkalpawhna a ti hmasawn hle dawn a ni a ti.

He project hi Rail Vikas Nigam Limited ten an thawk a. Project ah hian rel kawng km 125 a thui siam niin leiverh hi 16 a awm a. Heng leiverh zawng zawng thui zawng belhkhawmin km 105 a ni.

<><><>

SC

Supreme Court chuan Waqf (Amendment) Act 2025 khinna thubuai vawiinah a ngaihtuah chhunzawm dawn. He thubuai ngaihtuahtu bench in a zawhna pathumte chhanna pe tura sawrkarin hun pekbelh a dil avangin nimin khan Supreme Court hian Waqf (Amendment) Act 2025 chungchanga thupek lailawk siam a tum chu a thulh rih a. He bench ah hian judge pathum CJI Justice Sanjiv Khanna, Justice PV Sanjay Kumar leh KV Viswanatahan te an awm a ni.

<><><>

CJI

Chief Justice of India Sanjiv Khanna chuan Justice B R Gavai chu Chief Justice thar anih tur thu a puang. Justice Gavai hi Supreme Court Judge zingah a senior ber dawttu a ni a. Union Law Ministry chuan Chief Justice of India thar ni turin a rawt bawk a ni. CJI nilai Justice Khanna hun hi thla leh ni 13 hian a tawp dawn a ni.

<><><>